

僊居集卷十六目錄

文附錄下

宋 劾史彌遠疏 張次賢 鄭志

張正諫墓誌銘 葉夢鼎 鄭志

元 僊居縣重修儒學記 陶凱 赤城後集 三台文獻

明 率蕭縣城守諭 鄭恕 鄭志 下並同

救海豐判官疏 張伯厚

贈俞文峯擢建副憲序 張儉

四瑞圖序 曹勅

林介山先生文集後序 張奇

光緒僊居集 卷十六 目錄

張禹門公行狀 孫震

文補遺 外編 三首 內編 九首

元 題天台吳康肅公家所藏朱文公遺墨 戴表元 剡源集

張尚書救荒後記 袁楠 清客居士集

宋 宋故楚州寶應令應君墓誌銘 黃灝 應氏譜

明 尚友圖序 張儉 圭山近稿 下並同

重建政和縣儒學記 張儉

新建崇賢書院記 張儉

考亭石坊牌記 張儉

中孚橋記 張儉

刻三賢集序

張儉

上鄒東郭先生

林應麒

介山稿略下同

上久菴黃侍郎

林應麒

寄郭黃厓方伯

林應麒

光緒僊居集

卷十六

目錄

二

僊居集卷十六

文附錄下

宋

劾史彌遠疏

張次賢

臣聞天下安注意相天下危尤注意救時之相救時之相非有才德者不可今天下何時也敵日熾國日蹙顧可以才德兩虧奸回無賴之小人如史彌遠者爲之哉夫彌遠之怙勢縱欲病國妨賢惡蓋上通於天臣已九疏其罪陛下付之罔聞留中不報何也豈以彌遠罪不至此而言之非其情耶臣自弱冠登朝仰荷知遇之隆頻擢清華之地自愧無補徒以口舌待罪諫垣

光緒僊居集

卷十六

文附錄

一

死有餘辜倘復不能廉實核真輕任意氣而以莫須有歸獄丞相縱聖德優容不加之督天地鬼神亦當厚誅臣獨何心而敢其然况彌遠待臣不薄少與臣歡又於陛下前讐臣不容口其所以一言之不足再言之再言之不足痛哭流涕反覆言之者誠以丞相之責重彌遠之害大故甯背私恩不忍違公論甯身蹈斧鉞之誅不忍坐視國家釀傾覆之禍也夫不知將來宜視已往陛下亦思彌遠執政以來果異謀奇策令強敵不敢窺伺乎果正己率物正百官以正萬民乎果汲引盡善類擯斥盡僉壬乎果清介自持苞苴不行乎夫彌遠何才患得患失樹私植黨卽其才彌遠何德嫉功妒能縱慾敗度卽其德彌遠一日不

去天下一日不安百姓怨咨士氣彫喪民有離心軍無鬪志雖  
欲不亡不可得也伏乞卽正兩觀之誅勿怠四凶之討天下幸  
甚

光緒僊居集

卷十六

文附錄

二

張正諫墓誌銘

葉夢鼎

都諫文肅張公老成抗節臣也累朝嘉其忠愍眷注特隆且以椒戚媼聯追檢實厯於其沒也賜諡贈秩敕中書省遣使祭葬如禮卜嘉熙庚子十月吉窆公於后嶺之原暨今咸淳戊己間再飾封塋其子克耑輩以朱學士德剛所爲狀丐銘於夢鼎夢鼎與公同鄉同志知公最悉曷辭公諱次賢字思齊別號竹坡裔田天台亭頭徙仙居板橋再徙市橋唐中議大夫文伏卽公始徙祖也高大父止信中童科任浙幹官曾大父起邃隱德大父勇業儒名家稱浩然先生考禪以公貴累贈朝請大夫妣吳氏贈宜人公生穎脫長益不羣博極諸子百家靡不得其要繁

光緒僊居集

卷十六

文附錄

三

爲文下筆數千言頃刻立就譬之東注下流浩不可禦然英發豪邁之氣又能表表自見早領省試入國學登紹熙癸丑進士第通判臨安府進拜監察御史職司糾劾務以搏摯爲能公獨侍講經筵多所啟沃首揭古今治亂之由國家修短之驗爲書二十卷名御鑑錄反覆陳說俾示朝堂且曰陛下不熟此將無以自立况爲天下君乎故事臺諫充經幄而近來日講者未免因循公毅然以儒術正君孜孜不倦又陳恢復三策動中機宜中外傳爲石畫嘉泰中仍以右正言兼侍講滿考遷諫院左司諫正色敢言不避權倖力劾時相史彌遠章九上彌遠陰囑同僚止之公曰焉有言官反爲宰相作說客耶併列其附勢不法

狀彌遠銜之多方擠排而公素以忠直爲上知卒亦不罹其害披肝瀝膽知無不言在廷方之爲殿上虎其風采可見週歷臺院幾二十年裨補朝廷良夥嘉定辛未遷殿中侍都御史朝綱倚重將大用之故公力辭不允越五載始得家歸暫令展墓三月隨促還京使命絡繹無何而疾作遂以左朝請致仕迺戊寅五月一日卒於正寢距其生紹興乙亥二月十六日也享年六十有四朝命惜之贈中奉大夫諡文肅公公生平孝友處家庭各盡其道居官廉居鄉厚跡其操履人無不嘖嘖而豔慕者又能以文章節義啟後進卽猶子同甫擢殿元而不屑仕進蓋公有以風之所著詩文及奏牘講章凡十卷行於世配謝氏丞相

光緒僊居集

卷十六

文附錄

四

深甫女於皇太后爲姑封夫人先公卒繼鄭氏侍郎雄飛女兄封碩人後公卒子男二長卽克耑謝出襲公廕任直祕閣錄事召對內殿欽賜進士出身次克嘉鄭出咸淳戊辰特科女一側室朱出適建安法事郎吳師旦孫男二紹鳳紹宗皆足世其家公壙與謝夫人合賜命凡若干年今復以鄭碩人祔焉大興封塋工作嗚呼若公可謂死有餘榮久而弗替者惡可無銘銘曰吳山而東越水攸同歷千百年篤產令公立朝峻節矢心烈烈凡厥忠貞卓哉殊絕載錫之親帝室聯姻優渥寵斯匪止及身拱木已久封邱是厚鐫茲芳銘永垂不朽

元

仙居縣重修儒學記

陶凱

成周立國都辟靡諸侯類宮而黨術庠序興焉秦漢以降京師建太學因而不革惟州縣學廢置不常自宋至我朝州縣立學始著爲令又增創書院視庠序其扶樹天常基本政化爲甚重也仙居縣舊立先聖廟未始有學宋皇祐初陳古靈先生令茲邑卽廟立學以教其邑人自是科第得士賢才彙進嗣令徐君杓旣廣黌舍丞劉君屋又繕治之而儀以備乃者疆場多故兵革荐興學舍日就傾圯土無所肄業令陳君至謁廟下顧瞻惕然諗於眾曰學校政之本也今弊陋若是乃弗究弗圖斯害政

光緒僊居集

卷十六

文附錄

六

甚大郡類宮廢不治郡長貳謂教道不興人紀數壞曷由勸厲以遏亂略輒捐錢粟用佐修理然則下所視效其責不在我乎因出已俸倡士民輸財助官暨主簿何君咸相左右遂命木工度材土工搏埴石工伐石金工煨金又命佐史俞禮程工積事凡傾側者飭正之朽腐者革易之缺漏者補葺之秋溢者充斥之於是奠獻有位講試有所宴休有室庖湍有次曾不數月百廢具舉人咸咨嗟歎羨以爲上之人政化所被而君有以成其功焉凱族父庸實領教職爰述事狀徵文以記之凱惟古學官之制入學尚齒習射上功祀先賢以教德養國老以教悌出師受成人釋奠以俘獲告非徒教以詩書禮樂而已固望其德成

教尊官正國治以爲化民成俗之本也今士大夫被介冑執橐  
鞬日周旋戎伍俎豆罇彝缺而不講久矣而一二官僚乃知敬  
教勸學以爲治本顧不偉歟夫學校教化行使民敦孝弟興禮  
讓知公廷就賤觴豆受惡衽席坐下而齒德不遺寡弱不陵而  
凡奉辭伐叛興兵禦侮以忠信爲甲冑禮義爲干櫓則軍政有  
禮而武功告成矣然則興崇學校庸詎非當今之本務乎君推  
本爲政上繼前哲追蹤往古誠不可以無紀也於是乎書

明

率蕭縣民城守諭

鄭 恕

天下事有非我臣民所可知者氣運也有爲我臣民所不可不知者職分也天無二日民無二王建文皇帝聖祖神孫嗣位守文數年深仁厚澤磅礴中外於今殺運未除燕兵南指昭陽出狩未知駐蹕之所此正我民不憚征繕以待之時也北兵四出徐已見告矣凡我士民食土已久束手待斃毋乃不可乎今願與士民約蕭雖小邑尚有城堞可守城內粟米可支數月區區欲與爾輩編什伍張旗幟鳴金鼓效死自誓以爲不悖不叛之臣料爾眾庶不我棄也祇惟以不敵爲患耳昔睢陽一邑漁陽

光緒僊居集

卷十六

文附錄

八

鼙鼓動地百計不能攻至於曠日持久俾唐室得預爲備收復兩京至今稱功以睢陽爲首是故功不難創建患無其志有其志矣患無其地有其地矣患無其人有其人矣何患而不爲朝廷立一功吾志決矣爾民從我者爲良不從我者爲叛分在今日明辰不爲左袒者爲我驅而出之軍命如君命無貸

救海豐判官疏

張伯厚

臣聞禹下車而泣罪人湯見網爲解其一面而祝之古昔盛王意念仁厚與上天好生之心不毫髮間不獲已而用刑罔非慈祥愷惻之爲甯失出毋失人是以德威所加遐邇服懷流及後世子姓蒙慶非衰季羅織滋蔓草菅人命之主所可同年語也陛下掃除慝穢奠安社稷神武不殺至德難名不畜軼禹湯而上矣近見海豐縣判盧參一案臣不勝驚異不勝痛惜以爲禹湯當日必不忍爲者陛下何忍爲之參跼蹐狂狴數年於茲矣箠楚備嘗體無完膚訊官遞易不得其狀而卒未邀浩蕩之恩寬恤之典者謂係不奉詔侍郎迴姪耳昔大將軍敦謀不軌罪

不連王導諸葛兄弟分仕三國彼此各信用之勿以爲嫌士各有心豈盡相同古人用法兄弟且然何論叔姪况參之無他更有不俟曲爲之解始白者迴居禁近參居僻地道里遼隔非知情合謀者比迴爲大臣朝端倚重參爲下吏官守輕微位分懸殊非權力協濟陰爲聲援者比迴在金陵倡議堅守抗拒我師參在海豐早識事機承令納款順逆不同又非遲徊觀望勢逼始從者比古稱殺降不祥參其已降者也今徒以迴之不降連坐其姪不念參之已降寬恕其身豈用刑之得其平耶且卽以迴論桀犬吠堯亦未可盡非也伯夷叔齊周之頑民殷之義士臣屢讀詔書諄切命內外臣工訪求骨鯁才節之士以聞臣緬

迴所爲殆骨鯁者流假迴今日而在臣工猶將薦之陛下猶將用之矧飄然毫無干染之姪其不足深罪固明甚哉昭王求千里馬不得得千里馬骨市之不浹歲千里馬盛至參亦千里馬骨也余闕死元我太祖廟祀之意豈爲元耶陛下幸赦參天下見朝廷崇尚在此優容在此自交相鼓勵而嚴氣正性之儒能以身許者其來也必有如昭王之馬者參不赦參死而已甚不足惜臣恐薄海內外聞之將謂忠義爲賈禍之媒赤族之階父兄宗長指爲鑿戒正人君子自揣其無所容潔身遠遁而脂韋鄙軟之夫眉揚計得將爲天下羣趨之鵠紀綱風俗尚忍言哉臣狂瞽不識忌諱昧死披瀝惟陛下察之

贈俞文峯擢建昌副憲序

張儉

予讀宋史至咸平中見張忠定公復知益州之事然後知古賢君愛養黎元保固疆圉憂之深而慮之遠也夫以忠定公之剛正忠義始知益州治政優異繼而復來政績尤著可謂上不負天子下不負百姓中不負所學矣而真宗所以褒獎之者輒曰得卿在蜀朕可無西顧之憂吁何明良之遭際有如此哉蜀介秦楚間與西裔雜處氏羌之種無慮數百咸據險桀驁自古爲患而安綿松潘建昌諸道尤當其鋒嘉靖己丑簡命俞君文峯爲安綿兵憲文峯才識精練威惠並行未幾而壩底納款歸厥侵疆平番堡成而夷夏斬然事聞聖天子大加優獎癸巳歲文

光緒僊居集

卷十六

文附錄

十一

峯以年勞奏績遂有建昌副憲之擢蓋建昌在大渡河之外壤接滇南土地物產異常春夏多瘴癘俗惡蠻悍尤爲繁劇故前此若今大中丞南澗楊公方岡胡公皆天下之才望非此莫可使者茲聖天子復以處文峯其亦復以忠定公知益州意歟文峯感激知遇以向所治安綿者治建昌宜如就熟路而駕輕車無弗易易况知其地之難與其命之重則其所以懋著大猷艾安西陲以福全蜀者要必不使忠定公專美於前矣予與文峯忝同鄉同寅以處則久以知則深辱諸僚友之命聊舉忠定公爲期亦輔仁之義也文峯他日宦成德立遺愛在民以列於四賢之祀其亦有徵於子言歟

致又本之徵也卽本支而瑞家又能瑞國豈非道之所符而自然之驗耶噫圭山公可謂邦家上瑞矣

光緒僊居集

卷十六

文附錄

十二

張禹門公行狀

孫震

公諱堂賞字崇懋禹門其別號也其先天台之亭頭人後唐大  
中大夫德昭公文伏始徙仙居邑西至趙宋子姓遂大繫衍正  
諫文肅公次賢一門祖孫父子昆弟叔姪相繼登第金貂聯蟬  
蔚然稱安洲之望族洎我國朝人女尤盛如尚書郎亭玉公珽  
長史伯厚公鏃中書世昌公宗福行人世賢公宗顏少方伯圭  
山公儉立朝偉績照耀簡策他如治中縣尹以循良著績者蓋  
指不勝屈也公乃涇橋公之第四子涇橋公諱奇爲當代巨儒  
天下無不知有涇橋先生其人者居養不仕善籌兵倭奴入寇  
郡伯譚公綸用其謀以取勝後譚公經略三邊防禦得法亦涇

四瑞圖序

曹 勅

山林之士往而不能返余蓋班固所謂短云乃閒暇日日或論著私述楚史按史記及歷代書各能之不滅功臣賢大夫仗義俶儻懋立功名之業圭山張公浙仙居世家也擢進士上第由比部郎歷外臺副蜀廉訪使撫治川東至二年所治縣梁山蟠龍嶺產白兔公按部過楚人持獻口能道聖瑞霜毛硃目公移上中丞有臺宋公有臺考謂瑞獸王者盛德則至乃傳以獻聞上詔告郊廟進兩宮降受廷臣請賀部卿翰史一時賦頌藻揆天庭事在嘉靖壬辰秋八月詳載蟠龍嶺大宗伯桂川夏公所撰頌碑先是丁亥夏四月公先壠在象山有五色露降松林

光緒僊居集

卷十六

文附錄

十三

中凡七閱日露味甘視之如飴綴凝大如指小如箸己丑秋八月公憲節駐建甯建甯庭下桂華而實明年紫黑如葡萄多似石子計種土卽生又明年益盛今建甯有桂子軒乃前大巡東崖虞公爲公立至是比愛甘棠云庚寅冬十有二月公家祠置蘭一盤時大雪蘭茁紫芽如筍凡七花氣濃香計朵凡四十有九公禁採折得結實如罌粟粒粒如胡麻子許夫七與七七數皆陽也陰剝而陽盛殆化俱而類從矣乎重慶通守朱子楊子節推李子知公事悉論次其凡曰壠松甘露庭桂紫實臘雪芳蘭蟠嶺瑞兔命善繪者圖之蜀搢紳競爲詩文游揚厥美余聞世以桂蘭比世而松壠又世本也白兔則公奉揚天子明德所

林介山先生文集後序

張奇

介山林公青年登甲科才名英望爲一時最初試吳江令卽銳志以剔姦鋤彊扶植窮弱爲務利害是非一無所顧因以是困且十有八年迺今爲惠州同政故其素所蘊藉未得奮施於世及時事所觸有不勝其慷慨激烈者雅於詩若文發之門人金子少濱哀其卷什付諸梓問序於予予憮然曰詩自唐李之衰文自六家之後久矣其不振也迨我朝黜華返淳至正德以來古風乃蔚然諸染翰之士斌斌乎競起角立矣然儼文者唯詞之工而或靡其情局體者僅法之拘而不融其意故翱翔藝苑橫照今昔者之未易言也介山詞調清逸氣格宏昌上下乎

光緒僊居集

卷十六

文附錄

十五

秦漢魏唐間緣於情之所暢根諸理之所極而能神變於驪黃牝牡之外使人悠然於諷咏之際蓋沉鬱之久而誕洩其精華於斯豈所謂窮而後工者乎雖然茲未足以究公之深者公負不世才少輒以天下爲己任茲莅惠未數月慈祥豈弟之澤遐邇馳播清慎明決之風上下昭孚則公之所以困於前而大行於將來者自今可預期也異時左右天子黼黻鴻猷出其緒餘作爲雅頌以歌詠朝廷功德以殷薦於清廟吾知必能侈一代之光以傳之無窮則斯集也特變風之一體耳余泉石膏肓烟霞痼疾烏足與譚此者第髫齡與公同學長共游於陽明夫子之門受教益深且重金子之請也遂忘其陋序諸簡末云

橋公借箸力居多。大父閱耕公棟。仕授宣議郎。除虞部主事。曾大父北野公成德。仕至饒州別駕。所歷有聲。公爲世家子。嗜好如貧士。於聲色勢炎。淡如也。性穎絕。十歲讀經史。各書悉遍。十三乃翁攜謁陽明子於姚江。陽明子深器之。曰是兒多慧道骨。夙成弱冠。邑大夫敦請與吳左都寤齋公纂修縣志。筆削精核。綱舉目張。不詭於正。寤齋公嘗自嘆不及也。又與郡城李公邦燧著忠烈傳若干卷。宗譜散失。殫心繕輯之。綜該簡贍。昭穆世系燦若指掌。華而不浮。大而非夸。無祖狄梁之訛。天下言譜學者。必曰禹門張公焉。爲人疏疏落落。以氣節高天下。每雨夜挑燈讀史。至荆聶諸傳。輒號泣驚呼。宿鳥桀桀起雲。亦爲之停。

光緒僊居集

卷十六

文附錄

十七

作詩文若怒鵲驚濤。駁雲駛電。讀者目眚。性至孝。篤友于。步趨皆有古法。不尺寸移。居鄉黨。恂恂至大義所在。則憑怒厲聲。雖孟賁莫能奪。喜交遊。聲氣所投。千里命駕。然非名流不與之俱。無義丈夫。以軒冕榮者。公皆隸畜之人。或以急難告。傾貲與之。捐身命赴之。不顧也。嘗之楚登岳陽樓。作洞庭夜月賦。一時競相謄誦。楚府聞而說之。大張供具。延公爲上座。飲酒交錯。歡若平生。比告歸。王贈以文綺金貝等物。甚厚。悉峻辭。勿受。公又樂以道誘掖。後進孳孳。勿之倦。四方聞公名。爭負笈從。以不出其門。爲恥。通府尹遇齋贈詩。有時當化雨。施無吝筆。掃波濤。興轉濃之句。蓋實錄也。晚年築別業於城之西北隅。顏曰蓁斐軒。貯

古圖書詩畫其中四圍翼以修竹數千竿雜置名花怪石焚香  
靜坐經營千秋之業求田問舍翁過之不與一言所著有英雄  
槩讀史間評竹窗雜俎禹門文集行世大抵公之行已在隱現  
之間皆較然不欺其志如水中芙蓉灼然泥而不滓者也爲文  
以理主以氣輔體格駸駸秦漢間非近代所可小及試咸拔幟  
屢見別於棘闈終身不遇亦不之憾酷嗜佳山水足跡幾遍海  
內奇觀惟不登廣武觀古戰場爲恨遙作詩弔之其氣勃勃如  
項羽破邯鄲時公生於嘉靖某年某月某日以萬厯某年某月  
某日考終娶夫人林氏評事臯之裔孫女知書稱克相生丈夫  
子二鍾斗鍾參能世其學皆以文顯人比之蘇眉山父子云

文補遺

元

題天台吳康肅公家所藏朱文公遺墨

戴表元

字帥初  
奉化人

吳康肅公以清純謹直為江南名臣朱文公銘其墓誰復有異  
評者今又獲觀文公親書為公所作唁疏挽歌二幅彌可珍尚  
其時士大夫人人愛惜自重不敢棄其身為不肖者不但名義  
當然亦懼端人正士之不與而或議其後爾嗚呼嚴哉

張尚書救荒後記

袁 楠

字伯長  
慶元人

儒學提舉天台柯謙自牧為序一通言今工部尚書張公之佐  
江浙也活飢民禡貪帥為去思帥能歌詩者追美之是可謂無

光緒僊居集

卷十六

文補遺

十九

負張公矣往歲楠以翰苑屬歸里里人言元帥府始治婺女有  
總戎官鎮慶元言慶元聯蠻國入海最近稍失控御兵鬻不可  
測乘驛入都白利害時太傅丞相坐省中盛言總戎非兼元帥  
不足以重鎮太傅察其言有私便後雖移鎮而卒用常調官如  
舊制焉大德十一年歲大饑浙東副帥命屬吏疾傳詣行省告  
變曰慶元接海口僅數十里羣盜據島嶼出沒將入城剽劫願  
速分行省軍往翦其窟穴緩則不可治行省大驚將如議張公  
時為郎中丞相謂公曰計安出公以調兵非所預丞相固問則  
曰果有變帥府當印署白省副帥獨遣非完議也召屬吏問變  
奚自府有鎮守官今上變為何地屬吏頰首不能對遂移檄問

盜今安在帥府得檄大驚咸言無是事由是卒不發兵而慶元  
迄無他噫方副帥造謀時當饑侵窮困之急稍加以兵山海逋  
竄甯能斂手以快鋒鏑一有抗拒誣以叛逆則凡故家大姓蔓  
延於囹圄之下將不可勝計人能知救荒之爲美績而不知吾  
里之人微張公之言有不待賑恤而皆置於死地矣敢書以補  
郡乘俾知夫立帥府本末蓋如是張公名 字士瞻衛郡人處  
事明遠知大體若是事甯勿爲記其可乎

宋故楚州寶應令應君墓誌銘

黃灝

字商伯都昌人  
甯宗時任提舉

隆興癸未灝以進士升籍於吏部與僊居應伯起爲同年其後  
灝假邑德化伯起亦分教九江爲同官積素累好久而愈深一

光緒僊居集

卷十六

文補遺

二十

旦奉其父故寶應令君世行壽狀求以刊諸幽灝無升堂一拜  
之舊幸得與其子游敢不敬而銘諸應氏家本汝南在婺之永  
康者自東晉灌陽侯詹公始其裔孫傳巖居士始遷夏閣公之  
五世祖也曾祖諱常侃祖諱禹玠皆不仕父允中以高年累官  
承奉郎僊居邑小而風俗重本以力田相尚政和而上無以進  
士起者承奉獨以儒自命置傳禮方聞之士教子與姪皆以儒  
時公及從兄灌從弟頤俱有文聲未幾灌頤相繼擢第公亦寶  
興受遣仙居之勤於儒昉乎此公諱權字偉節其先以富著累  
世爲右姓至公權宣和呂寇之暴鄉里失保生業泯焉不具自  
是時多艱虞承奉中年而鰥至于耄耄公仰事俯育惟飢渴寒

暑是懼遂就特恩以養任婺州東陽主簿時承奉年九十一矣  
非公事未嘗去左右出必戒家人侍側滿考康甯如始至夫婦  
白首相扶奉安車以歸故里一時尊之公平生嘻笑不妄務以  
誠自待常謂諸子曰君子所不可及者其惟人所不見乎故爲  
政不敢有易心東陽有爭田者至卅年更三官不解公立解之  
遂詣守自言守難之曰老生難與言事宜勿聽居無何其家爭  
產吐實如公所言士以此多敬公再調楚州寶應知縣告未下  
承奉忽感疾公心動卽日馳歸未幾承奉卒公性至孝哀毀過  
人不能終喪亦卒時官修職卽年七十實乾道丁亥中秋四日  
也孺人陸氏後公十年卒男三人長士約任迪功卽次士廉再

光緒僊居集

卷十六

文補遺

二十一

冠鄉書今從事卽臨安府新城縣丞又次則振也今儒林郎監  
鎮江府寄椿庫女一歸金部郎官直祕閣致仕鹿何孫男八人  
嘉祥馨星耆清虞南皆業進士孫女八人其五已行餘在室諸  
孤以乾道庚寅正月十五日葬公于臨海縣鳳岑山新塘之原  
公純孝人也遭家凋敝辛勤修子職終身不懈弟妹婚嫁力弗  
足以其妻齋裝資給之皆及時承奉無幾微不滿意授諸子各  
一經不使給私自營內則雍雍無間言屬纊之日諸子請所欲  
言書人心善惡一一聞天無一語及家事嗚呼古之所謂君子  
純篤有守若此者非耶灑旣論次之遂系以銘曰  
於維應君學以爲己再成厥家以養以祀自幼至老以孝終始

左子右孫俛俛滿庭天豈其欺其攷我銘

朝議大夫提舉兩浙常平茶鹽公事黃灝撰  
朝議大夫直龍圖閣權江南東路計度轉運副使彭椿年書

尙友圖序

張儉

尙友圖者不肖儉所自作也始于羲農迄于熊勿軒凡與道統者必在焉不以性勉分不以述作異不以言行殊不以隱顯間要其同也別上下帙以嚴君臣之分示不以賢智先禮也下帙始孔子道之宗也每人必舉行實載著作備徵也瞻道範而肅敬畏考德行而切思齊誦訓言而善知所勉過知所規一展卷而千聖在目矣則夫庸闇陋劣之軀敢不惕然悟幡然改以求去其所以不如聖賢而就其所以如聖賢者乎此作圖意也儉

光緒僊居集

卷十六

文補遺

二十一

自幼妄自挾自傲長入仕途又惟知以盡職爲能至於以義帥氣以理制情得寬猛之中適因革之宜使學去駁而純使性去疵而粹實亦未之究心也嘉靖己丑幸托賢邦首謁考亭暨濂洛關閩諸君子茫然自失遂圖其像懸之書室朝夕親薰以消磨其悍傲不平之氣旣而遍求諸真像以廓大之斯帙苟完而入道之門戶亦竊窺其一二矣嗚呼不有先覺孰啟後人此固不肖之所以汲汲死而後已亦覩斯圖者所宜共勉也

重建政和縣儒學記

張儉

我國家做古建學爲成賢育才之地又祀孔子及諸賢之有功於道學者使朝夕瞻仰興起其欽聖懷賢之心故堂曰明倫齋

曰據德亦曰依仁殿曰大成其所以致拳拳屬望之意者非淺矣諸士入是門親師友以成其身出是門由科貢以致其用其所以沾濡聖化極盡心知性之功匡佐明時效裁成輔相之道舍是其何居哉嘉靖己丑秋八月予奉命按治建州旣歷政和詣學謁孔子與諸士商確經義自朝至昃諸士充然若有所得因進而請曰政之爲學久且頽敝而文廟逼市井尤褻慢不稱惟明公圖之乃以謀於邑令潘邦相令曰舊傳所駐分司爲飛鳳金籠之形實地理家之最勝然以其爲臬司也不敢有請予曰嘻昔范文正公以其宅出相讓爲學宮與郡人同之卽今之蘇州府學是也吳邦人物用以不衰而文正公之仁亦不朽况

光緒僊居集

卷十六

文補遺

二十三

分司儒學均爲公所予豈私哉令曰雖然費亦不貲奈何予曰松溪普載寺近徙爲學聞其寄莊於政者有田若干取其直以充費何如令曰善遂具以成議白于大巡施公鎮卿可其請經始於庚寅之冬落成於辛卯之春不斂於民不匱於帑厥地維雄厥制維偉去卑褻以就尊嚴化頽敝而爲新美巍然煥然殆與建甌諸學爭先矣是歲之夏予復東巡乃進諸士而語之曰諸士其知斯學之所以新乎向使謀弗豫志弗銳力弗勤材弗備其將有成乎諸士曰願聞其要予曰噫道豈遠乎哉自言動食息以至家國天下一理也惟志弗立則棄惟功弗恆則隳古之論道者多矣而予取其三日中日誠曰敬敬則惕惕則不苟

不懈誠則確確則不恕不欺中則不引以自高不俯以自卑而守之約也要之敬爲門戶誠爲堂室而中爲堂之中乎諸士其勉之諸士咸欣然曰用其地藉其資享其成以毋忘訓言吾庶幾無負於明公以無負於國家作養之意哉遂相與礪石請予書以訓諸久

新建崇賢書院記

張儉

崇賢書院所以崇祀崇安之賢使凡由仕而入閩者必首造焉庶幾瞻仰而得所觀法且以詔其鄉之士大夫使知世之所以報祀者在此而不在彼庶幾歆羨而有所取法焉由觀法而得善政由取法而得善俗則我國家之治化豈不益光大乎由一

光緒僊居集

卷十六

文補遺

一千四

邑而得多賢則全閩可知矣豈不益增重乎書院在崇安邑治西之通衢自南閩第一關而入者必過焉其地之直甚廉費之給以贖金其山川之勝白華諸峯若端向拱揖而西溪環抱其後又舊有茂林修竹若天以遺後人者前爲重門繚以週垣中爲崇賢堂堂北爲六龕以妥神自游雁山而下胡則武夷籍溪致堂五峯茆堂劉則屏山草堂自晦翁而下蔡則西山節齋九峯以及劉雲莊熊勿軒徐進齋有功於道學者凡十五人各以齒序以類從而父祖子孫師生之席不紊劉忠顯忠穆忠肅吳武安翁忠承則以忠義從江少微則以隱逸從雖所造不同而足以表世一也不敢像時制也堂之後爲泰山仰止堂揭御製

敬一箴於楣上龍文金書昭其重示所尚也與前堂各自爲兩廡廡東西罅地別爲小房擇蔡氏子孫之知自立者生員文祥居之以備潔除籍廢寺田八十畝爲租若干以充春秋祭享以備時葺之需經始於庚寅之臘落成於辛卯之春其材精備其制宏敞其慮久遠廊廡餘室可以講學可以會文載瞻道範仰誦聖訓可以自得師閩洛之墜緒可尋崇安之後賢將不由是而益著乎維時大巡施公鎮卿虞公惟明蔣公伯宣力主其議大中丞南津胡公少監師公迺贊其決始謀而董成者予予實不肖而諸公則極一時之望也共其役者經歷陳言縣丞袁大純義民暨益知效勞例宜及之

光緒僊居集

卷十六

文補遺

一十五

考亭石坊牌記

張 儉

予嘗讀子朱子大全反覆考究其師友答問之語無非輅致誠正修齊治平之實學雖近而一言小而一事必本天理而度人情上考百王之成法下立萬世之準繩真一代之元龜諸儒之大成也若夫表章六經作爲傳註不過傷漢儒之附會疏釋此理以發明先聖先賢之蘊奧使斯道如日中天家喻而戶曉之一洗漢唐之謬誤以啟我後人特道中之一事耳要之先生之所造不在是也後世不察以傳註爲先生功固不足以深知先生以傳註爲先生病又豈足以知先生哉按譜宋慶元元年乙卯先生始定考亭之居六年庚申三月甲子而先生歿是考亭

實先生之闕里不可以不重也明矣世之尊先生者有堂有殿  
有廡有燕居有故居又有慶雲樓半畝方塘亭有泰山喬嶽景  
星慶雲道學淵源等門其所以崇道德而極壯觀者無弗至矣  
然而隨新隨廢未能爲久遠之計者也嘉靖辛卯侍御蔣公伯  
宣巡歷建陽振治萬事沙汰百吏之餘尤以崇德尙賢爲首務  
瞻拜道範嘆廟門之卑隘遂以謀於不肖欲爲石坊牌之舉儉  
雖不肖當任其勞矣乃捐贖金卜吉採石以命縣丞司馬懋成  
之而僭以蕪詞紀之俾他日有欲肆詆毀者必觀先生之全書  
以仰求其所養所造之極至庶幾有以肅敬畏之心消傲悍之  
氣使吾子朱子之道復大明於天下侍御公之力也茲役之興

光緒僊居集

卷十六

文補遺

二十六

豈非扶世教之一助哉

中孚橋記

張儉

達古爲通州州治迤南山曰翠屏水曰通川川之水發源關西  
歷太東而合萬頃池汪洋湍洄不可以厲揭又州自唐貞觀置  
總管府景雲中置都督府迄我朝成化十九年置撫治司莅以  
憲臣兼制川湖夷漢之民自重夔播州以至瞿忠施州其爲文  
武士流之屬員動以數百計其爲輿圖之廣動以數千計其爲  
政教兵刑財賦之劇司動以萬計其爲訟獄戎伍輸役之人動  
以億兆計咸不越茲川以度往過來續舟楫朽敗風雨所顛漲  
溢所漂甚爲民病嘉靖辛卯冬予奉命承乏監司旣至渡川左

右以病告予諦視之曰其浮梁歟越六月壬辰之夏政通人和乃以告州守吳昇守曰斯可以浮梁歟又以告於州之人人僉曰果可以浮梁也既而義民冉添俸氏告曰明公將以逸道使民乎俸請以五十金相之子歎曰是可以義動矣乃下其議於州民罔弗率俸爲首倡諸尙義者和之予足以贖金掄材鳩工凡五月而浮橋成爲舟四十艘爲板二百七十截爲鏈一百二十丈埠甃以石扁覆以亭堅緻精固實倍於凡梁民稱便焉吳守以名請予曰茲役也上以順使下下以說應上其中孚乎夫中孚爲卦上巽下兌木在水上又外實中虛皆爲舟楫之象故易曰中孚豚魚吉利涉大川利貞子程子曰豚躁魚冥物之難

光緒僊居集

卷十六

文補遺

二十七

感者也孚信能感於豚魚則無不至矣所以吉也忠信可以蹈水火況涉川乎茲梁也殆有取焉雖然橋王政一事也由橋梁而推廣之凡司之政與州之政咸若中孚則達之民其瘳乎由達而推於省於天下咸若中孚則省與天下之民其瘳乎由今以及後自一世十世百千萬世咸若中孚則一世十世百千萬世之民其瘳乎吾與子出入茲梁顧名思義匪貞勿動匪義勿施民之孚豈直豚魚哉吳守唯唯予從而爲之歌歌曰昔也弗梁民其病魚今也梁之蕩平以熙昔也弗梁舟之楫之今也既梁載馳載驅我舟我梁匪惠以私輔天之道相地之宜誰曰匪厲惟順是俾誰曰匪梗惟說是趨上順下說是爲中孚由之念

之以邀以嬉保之葺之勿忘勿遺惟義與信萬世同之

刻三賢集叙

張儉

嘉靖壬辰之秋某旣以夔三先生流風遺澤建白當道創蓮花峰之祠矣旣而大巡朱子禮氏檄諸司梓行名賢遺稿郡寮長貳復以禮聘太史楊實卿氏類選三賢集刻之書成范守廷儀等使訓導曾鎮致辭於某曰集之刻梓人已竣工矣盍序之以傳示夔士乎某郤俗焚讀之喜不釋手因歎曰賢者之文其有功於道有裨於政乎某聞上古庖犧氏仰觀俯察而畫八卦文之祖也堯舜氏精一執中更相授受道之宗也文以明道道以立政道明政理則治隆俗美而天下平斯文之爲用所以經天

光緒僊居集

卷十六

文補遺

一千八

緯地華國而傳之不朽者也觀於三賢之集詎不益信矣乎夫太極圖通書尚矣王宋二公之文明白簡易博大精深其論事必本人情其論理必根天命孰非有用之實學乎使夔之士由言以考心由心以考行則絕學可續敝政可新漓俗可厚將不徒爲絺章繪句入耳出口藝焉而已之學矣夔士勉乎三賢聞於夔以告夔士者欲其知所信也知所信則慕而愛慕而愛則傳豈徒傳乎斯郡寮長貳之意也某則以斯集之傳愛之者眾則效之者廣將大有功於世教豈徒夔乎哉鎮乎其以是復於郡之長貳可也

上鄒東郭先生

林應麒

不肖某自己西奉違道範倏逾一紀中經徙官滇南又量移嶺外壬子冬由惠陽奔老母之訃僅餘殘息丙辰夏杪倭夷殘破敝邑寒家鞠爲戰場養生之具罄盡坐是拮据奔走久稽修候然瞻懸之私固與日俱積也緬惟門下福祉駢臻盛德大業曰新富有而公子公孫接翮霄漢策勳揚名光昭宏緒積善餘慶固天道報施之常某何敢舉以爲賀伏念某自壬午童歲獲侍陽明先師又因南州妻伯引謁門下迄今四十餘年聽誦訓規心皆未嘗有所疑逆備遭頓挫險阻頗能不爲所困內省漠然遂自倚爲得力每見世途競趨功利之會得則決齧恣睢揚揚肆志不得卽忿恚熱中神銷魂喪欲然若無以自容者心竊鄙

光緒僊居集

卷十六

文補遺

二十九

之輒復妄自較量謂真能塵眠軒冕皆虛見也前年夏承門下教劄并墨刻雅咏附趙子道源來約某走晤會稽弁同赴甘泉翁武夷之會某擬束裝追從繼詢之自越來者云門下回駕且踰半月迺止不行失此良晤悵悵憤憤茲某居田頗久閉戶觀心將種種習根冥搜曲索始覺從前祇仗口耳義諦禁縛塵情於一切拂逆境界皆以頑空意識承接過去便自認爲得力實際誑已謾人罪過難贖況年逾五十前路轉欲相逼朝未有聞夕豈可死爲此悚息若涉淵水且索居無足就正雖欲激發切劘期於不負如中夜有求於幽室之中悵悵何見又家廢不能遠出卒業門下奈何奈何專此陳候并疏所疑於心者數節具

如別楮伏乞備賜教策以逭終矣無聞之恥不勝願望感激之至先師年譜及同志叙錄計當脫稿否聞之趙子謂張代巡惟進伍巡齟思行皆遊翁門下得寄言託之梓行尤足風勵來學也至望至望

上久菴黃侍郎

林應麒

某方入都竊聞時事大可駭嘆恐將來釀成元祐黨禍爲國家患害不少儉夫怙勢行私忍心滅理以白爲黑以功爲罪顛倒狂悖變亂國是至於如此凡有人心皆懷憤懣而舊在先師門下一二讒賊顧諛訛相煽造爲謗訕橫語以悅怙勢行私者之意爲其口實此人雖剝屍粉骨詎足以泄萬世神人之怒哉竊

光緒僊居集

卷十六

文補遺

三十

嘗以犬喻之方其食腥穢盤旋主人欄楯之下伺有外客輒瞋目張口迎之聲氣俱狠必搏必噬然後爲快於心眎其狺狺悻悻真若不負其主者暮夜有點盜焉投之以馘骨餒之以餅餌彼卽垂頭搖尾欣然就之拜舞馴服盜雖盡發主人蓋藏豈復顧耶雖然猶未至於反噬也此輩又誠狗彘之不若矣嗟乎先師日月也毀不毀固無傷於其明然某等皆受罔極之恩義與此輩不共戴天我公忠誠體國方爲天子所重而元山西樵涓厓諸老同心同德力足以請於天子肆此輩於市朝以少沮怙勢行私之羽翼牙爪庶於世道大有所裨也不然亦宜率諸同志之士二三百人待罪闕門決以身之去就生死爲先師求盡

白其心迹彰顯其功烈錄其嫡嗣世襲封爵之典配饗孔廟必  
得請而後已他日方可見先師於上帝左右也倘依違而不言  
言之而不盡使愼夫羽翼牙爪布置已成終無以白先師之幽  
微則將何面目以自解哉某激慙不識機宜惟門下察而教之  
幸甚

寄郭黃厓方伯

林應麒

客冬得仰誦執事遣奠南洲先師哀詞惋切悲悵情深而思永  
令人感嘆無已某緣衰病侵尋久稽裁謝罪媿罪媿向所呈覽  
文稿不知曾入梓否先師平生刻志砥行期大有樹立表見於  
世迺竟以讒阻名隳位息縉紳雖往往扼腕永嘆然未有肯堅

光緒僊居集

卷十六

文補遺

三十一

然出力爲之暴白者所恃以信後惟僅遺此空文而已幸值執  
事以隆德重望保釐全浙且素能諒警先師心迹行誼履歷仕  
止之詳力足以顯微闡幽使大章灼於後亦仰惟執事雄文鴻  
筆賜爲製序立傳冠於茲集之首庶幾先師得籍之以流播於  
不朽耳如荷俯遂不肖前後陳請之忱豈特師門九族存沒銜  
感凡在斯文同志莫不衣被執事光寵矣詎勝大願僊屺黃尹  
廉直勁正文學政事俱優或試以茲集託之刊布想當有濟也  
何如何如